



## Net neigierig.

Dem Herr Assesser vun de Bahn —  
Wann ich mich recht erinner,  
Hann ich 'n ledscht Sich vorgeschteht,  
Do kennen ehrn jo, ehr Rinner, —  
Iß ledschthi<sup>n</sup> wirrer waß bassird,  
Ich mäh'n, ich mißt verblaze,  
Ich war zufällig grad debei,  
Herrgott, schneid der Sich Frage.

Es dhun an unserm Giederschobb  
Die Maurer reberiere;  
Un de Herr Bahnassesser dhut  
Die Arwet inschbiziere.  
Offe gesaht, neerig iß net,  
Daß er do gejewerdig,  
Doch mähnt er halt, mol ohne ihn,  
Do werdd die Sach net ferdig.




Ä<sup>n</sup>mol iß er mol wirrer kumm,  
Dhut schnuffle un buschiere.  
E neier Schbeißbu iß grad dra<sup>n</sup>,  
De Schbeiß frich uffseriehre.  
Un weil der vun sei<sup>n</sup>m Schdrubbkobb net  
Sei<sup>n</sup> Räbbche glei' dhut reiße,  
Dhut de Affesser vun de Bahn  
Aah schon de Giggel beiße.

Er blanzet sich vor dem Schbeißbu uff  
Un saht mit lautem Gerre:  
„Kerrl, wääschte dann net, wer ich bin?“  
Defmol solld er sich erre;  
Der Schbeißbu guckt nor uff un juckt,  
Als hett 'n was gebisse.  
„Nä<sup>n</sup>“, saht er, „Herr, deß wäß ich net;  
Ich will's aah gar net wisse.“







## Im Keller.

Herrgott, iß deß e Drebbche,  
Deß laaft jo grad wie Gel  
Die Gorjel em enunner  
Un wermd em Leib un Seel.  
Sieh ich's im Glas so glikre  
Wie Gold so hell un klar,  
Mer ferscht sich's fascht se drinke,  
Grad, weil's so fei<sup>n</sup> un raar.

Geh ich so durch de Keller  
Un brob vun jerem Faß,  
Wer luscht'ger ich un besser  
Geschdimmt bei jerem Naß;  
Doch wann ich an deß Fäßje  
Im hinnerstd Eck dann kumm,  
Do werd in Dank un A<sup>n</sup>dacht  
Es Räbbche abgenumm.

Dann iß mers grad, als wer ich  
In unsre Kerch, im Chor;



Mer heert im ganze Keller  
Bum Wei" 's Gluckse nor.  
Un wann ich die Bibbe  
Halb voll 's Gläsje fehr,  
Iß mers, als ob im Himmel  
Die Engelcher ich heer.

Es soll mich kenner schelle  
We' dere Schwärmerei;  
Ernscht iß mers mit de A"ndacht,  
Kä" Gottesläschderei;  
Hääßts doch schun in de Bivvel:  
Daß Gott soll iwwal sei";  
In de Madur, im Mensche,  
Warum net aah im Wei"?

In der Beziehung hall ich's  
Mit 'm alde Fritz sei"m Ton:  
All' lossen selig werre,  
Jerer uff sei" Fasson.  
Un de Wei" macht em selig,  
Drum Dank der, großer Gott  
Un mach, daß uns ball wirrer  
So e Drebbeche werd gebodd.

---





## E Tuur durch de Pälzer Wald.

Wann Enner 's lieve lange Johr  
Muß schufte un muß schaffe,  
Wääs Gott, dann hott er's Recht dezu  
Sich aah mol uffzeraffe;  
Enaus se wannre in die Weld,  
Un sinns aah nor paar Dahe,  
Erum se laafe so lang, so weit  
Als en sei<sup>n</sup> Bä<sup>n</sup> nor drahe.

Deß weer schun recht, doch deß „Wohi“,  
Deß dhut en manchen queele,  
Ich for mei<sup>n</sup> Dhäl wißt for denn Fall  
Mer bessres nix se weehle  
Als wie enaus in unser Wald,  
In unser Pälzer Berje,  
Wos iweräl dort lebt und singt  
Bun Beggel, Elf un Zwerje.



Do schmeissen se ehr Geld enaus,  
Fahr'n Eisebah<sup>n</sup> un Scheese  
Un dhun mit fore Schweizertuur  
Sich johrelang noch keese —  
Doch fro'se noh Johanneskreiz,  
Schänzel bei Edelowe,  
Nohm Karlsdahl un nohm Bärelach,  
Un wasß noch sunscht se lowe . . . .

Do schtehn se do un kennens fascht  
Net glawe un net hehre,  
Daß mr in unsre Palz sich kann  
Erhole un kureere,  
Daß es bei uns aah Wisse hot,  
Die Wasserfur se brauche,  
Un daß in unsre Weiher aah  
Mr schwimme kann un dauche.

Zu dere Sort geheer ich net;  
Wann ich emol äh<sup>n</sup> Summer  
Mei<sup>n</sup> Pälzer Tuur net mache kann,  
Deß iß mei<sup>n</sup> greeschder Kummer.  
Deß Johr hann ich zu mer gesa't:  
Mahns bieje orrer breche,



Ich geh mol uff de Dunnerschberg,  
Wo se so viel d'vun schbreche.

Bis Winnweiler sinn mer gefahr,  
Dann gehts uff Schushters Kappe  
Weider durchs Falteschtä<sup>n</sup>nerdahl  
Mit seine Newelkappe,  
Die Lust do un die Ruh im Wald  
Un erscht die Felsebrocke —  
's isz wohr, wann ich so nufferguck  
Will mer 's Herz fascht schtocke.

Dann Falteschtä<sup>n</sup>, des Felsenesch  
Mit seine Klänne Heiser,  
Wäas Gott, vun denne Ridder war  
Gerer e Klänner Kaiser;  
Aah heit noch lebt sichs dort net schlecht,  
Geh hinner nor zum Schlicher —  
Do isz e gure Bisse deer  
Un e Schluck Wei<sup>n</sup> aah sicher.

Gäh fiehrt de Weg dann in die Geh,  
Un manchmol muscht verschnaufe,  
Bis glücklich for de Burg dann schtehscht  
E Schtä<sup>n</sup> un Drimmerhaufe;



Doch wann de gures Bedder hascht  
Do kannscht aah ebbes siehe;  
Mich wenigstens löst se e Bild  
Vergesse Schwäas u Miede.

Un wirrer dann de Bald enei"  
Dhut uns de Weg jезд siehre —  
Wie prächtig do die Buche schteh'  
Grad wie die Grenadiere;  
Zwää Shtunn gehts so bergab, berguff  
Dann schtehn mer uffem Gibbel  
Un fangen fascht am Keenigschtuhl  
Die Wolke an de Gibbel.

Turm, Waldhaus, Herdefesse dann,  
Die Wacht am Rhei" noch schbeerer  
Un wie die Plätz all hääse, schä"  
In seiner Aard e jerer.  
Un iwerall zeigt em die Weld  
Sich wie e neies Wunner,  
Uff die Aard kummscht, eh dich versieht,  
Aah uff die Willa runner.

Ich hann schun manches Bild gesieh,  
Uff meine Pälzertuure



Durchschträäst aah manches Schtickche Wald  
Mit Wisse un mit Flure;  
Doch nerjends hat mers so gefall,  
Als wann noh all dem Schwitze  
Ich vor de Willa Dunnerschberg  
Uff de Terrasß kann sitze.

Wohi de aah de Blick do wenndscht,  
Iwraal dhut ebbes winke —  
Am Horizont ganz fern de Rhei"  
Siehscht glizere un blinke,  
Un bischde dann vum Bucke mied,  
Un werdd im Maah ders heller,  
Dort drowe isß e guri Rich  
Un aah kä" schlechter Keller.

Haschd dann dich sattgeß un gedrunf,  
Bedracht noch all die Wunner,  
Gehst's hämezuß gemä"nerhand  
Noh Börrschtadt dann enunner;  
Mer hänn es annerschter gemacht,  
Mer sinn, trotzdem daß rejent  
Noh Dannefels enunnergang  
Bedrachten uns die Gejend.



Besonners ebbes derfsschde do  
Se gucke net vergesse,  
E mähdiger Kaschtaniebaam,  
Verwittert un verfresse,  
Un uff seim Schtrunk dhut schtolz un fed  
E klännes Dannche wachse —  
Waß die Madur doch iweraal  
Ehr Bosse macht un Fare!

Vorbei die Dannefeller Mieh!  
Dhut uns die Schoffee fiehre,  
Dann dhun mer wirrer in de Wald  
Uns schleinigst redderiere  
E wunnerschä<sup>n</sup>nes Wiffedhal  
Mit Bächelche un Brückche,  
Un dann gehts wirrer in die Geh  
Un deß kä<sup>n</sup> klännes Schtickche.

Jetzt Freind, jetzt mach die Aue uff,  
Un dieß dhu Odem schiebe,  
Dann so e guri Danneluft  
Helst iwer manches Arebbe,  
Haschd schun waß schenneres gesieh  
Als die Allee vun Fichte?



Recht iß, wann mit dem Schillerhain  
Die Kerchemer sich brischde.

Kerchem! Um so e aldi Shtadt  
Iß doch e eije Wese;  
Do kannschd bei jerem Schridd un Tridd  
In alde Zeide lese;  
Un iweraal die Drimmer noch  
Wun all de Tirm un Dhore —  
Nah so noch e Erinnerung  
An deß waß längscht verloore.

Un wer emol in Kerchem iß,  
Der loßt sichs net verdrieße  
Un geht aah uff de Kerchhof naus  
Den Ord aah se begrieße,  
E sunnerbar Gefiehl kummd em  
In dere Shtadt der Doore  
Wammer die viele Name lest  
De achtunverzger Johre. — —

Domit war unser Tuur zu Enn,  
Ins Schloßschteins noch e Halwe  
Dann in de Zug enei<sup>n</sup>gesetzt  
Un hääm; zwää Wannerschwalwe.



Mied warn mer, doch woß mer gesieh  
Deß dhut uns ewig bleibe;  
Wann wirrer ich e Tuurche mach,  
Dann dhu ich weiderschreibe.

